

靜  
志  
居  
詩  
話

靜志居詩話卷十三

秀水朱竹垞先生著

扶荔山房編輯

張居正字叔大江陵人嘉靖丁未進士改庶吉士  
陞編修歷春坊學士以禮部侍郎入內閣官至  
太師吏部尚書中極殿大學士卒諡文忠有大  
嶽集

江陵以奪情爲清議所不容然能自任天下之重定陵  
冲年請大閱京營之士時掌中樞者山陰吳尚書兌也  
尚書繪圖藏之家子曩從尚書孫錦衣使國輔處見之

及戚武毅鎮薊大臣行邊簡闕士馬隨上功狀疏恩晉  
秩烽火不徹於甘泉者一十五年江陵之秉國成可謂  
安不忘危得制治保邦之要矣近靈壽傅尙書維鱗撰  
明史記乃與分宜合傳毋乃過與于文定與邱尙書書  
云江陵以蓋世之功自豪固不肯甘爲汙鄙而以傳世  
之業期其子又不使濫有交游其平生顯爲名高而陰  
爲厚實以法繩天下而間結以恩其深交密戚則有賂  
路人不敢也債帥鉅卿則有賂小吏不敢也當其柄政  
舉朝爭頌其功而不敢言其過及其旣敗舉朝爭索其

罪而不敢言其功皆非其實情矣此足以當爰書聞有  
題詩于故宅者云恩怨盡時方論定封疆危日見才難  
二語足稱詩史矣

楊巍字伯謙海豐人嘉靖丁未進士除武進知縣  
入爲兵科給事中歷右都御史巡撫宣大陝西  
山西入爲兵部侍郎陞南京戶部尙書召入改  
工部復改戶部再改吏部加太子少保進太保  
贈太師有夢山集

夢山與中麓滄溟同郡而其詩遠法右丞左司近取蘇

門不蹈章邱猶鄙之音不墮歷下叫囂之習信豪傑之士也集不甚傳近新城王尙書德州謝郎中重爲鏤板始行於世夢山自言不知詩補晉臬時學使者曹君紀山謂當以唐人爲宗且辨其體格及歸田四明呂山人往來海上相與倡和共明此道云云呂山人者時臣中甫也紀山名汴江陵人嘉靖辛丑庶吉士仕至右副都御史巡撫雲南以夢山推許若是度其詩必有可觀惜無好事如王謝兩公刻之以傳也當嘉靖初北地信陽朝華已謝滄溟集盛唐人字句以爲律一時宗之正猶

隋苑瑒絲成花淺碧深紅未嘗不眩人目然生意絕少  
此時讀夢山詩如水仙十囊江梅一萼嫣然薄冰殘雪  
之外有不愛惜者邪

附錄沈山子云夢山五律固是長城其全首矜鍊者  
不待言句如風雨樓煩國關山李牧祠春風吹戶牖  
芳草遍庭除薄地不盈頃草房才數間漁樵原舊業  
荷芰有初衣花憶春城發門憐芳草多北窗風到處  
深樹鳥鳴時礪雪春仍積岩花夏始開家貧人卧穩  
橋斷客來稀杯外分平楚窗中到遠山霜筇連夕院

野燒到經臺野燒驚沙雁霜風落塞榆人垂燈下淚  
鬼哭雨中魂皆近自然豈四溟山人所能及

王樵字明逸金壇人嘉靖丁未進士累官南京右  
都御史卒贈太子少保諡恭簡有方麓集

方麓研心著書自言六經畢其四詩特游藝然清婉軼  
倫當饒甌太雨白榆澹思叫囂之會乃聞此雅韻實獲  
我心也短歌答趙江都金山見懷云海門兮長風中流  
兮孤嶼懷美人兮何方覽大江兮東去望湖亭云平疇  
門外春雨遠寺山西夕陽柳暗溪橋葢路水肥種陸江

鄉孤村數家隱樹一曲清流抱山四月城中未有林端  
黃鳥關關

孫永思字性孝蒲州人嘉靖丁未進士除行人選  
授浙江道御史

侍御海珠寺讌同鄉李崔二鴻臚詩云象設鄰鮫室江  
流達海門上方無陸路四壁有潮痕香霧籠珠樹飛花  
隨玉尊漁歌相聽處萍水不須論登鎮海樓云越王臺  
接五層樓島嶼連空起暮愁瘴海波濤浮日月炎天風  
雨自春秋亂帆歸晚聲相軋萬樹邊江葉盡流莫倚危



關聽吹笛武陵離思在南州二詩巡按廣東時作蓋嘉靖丙辰年事

楊繼盛字仲芳容城人嘉靖丁未進士除南京吏部主事入爲兵部員外郎坐論馬市貶狄道典史稍遷知諸城縣陞南京戶部主事轉戶部員外調兵部疏劾嚴嵩論死贈太常少卿諡忠愍有集

附錄皇甫子循云楊忠愍辭尙宏麗語罕怨誹江河一瀉乃徵其才光燄萬丈悉出於氣

彭輅字子殷嘉興人嘉靖丁未進士除江西布政司照磨遷知新淦縣左遷應天儒學教授轉國子監博士升南京刑部主事有比部集

先生早慧於詩文不甚敦琢其持論取法中唐謂神在象外象在言外言在意外然率矢口肆筆而成頗類解大紳卜華伯一流昔人所以有才多之憾也

徐學謨初名學詩字子言更字叔明蘇州嘉定人嘉靖庚戌進士授禮部主事歷郎中出知荊州府遷副使擢僉都御史撫鄖陽召拜禮部尙書

清江雜錄 卷十三 五  
加太子少保有海峯春明二橐

宗伯本名學詩以與劾分宜者同姓名遂更爲謨昔杜  
欽損目人斥爲盲鄴惡其同字遽自稱疾猶見詆於當  
時若宗伯更名乃屬患失百世而下知有直臣陳孟公  
之名遵何必驚坐諱哉宗伯雅負詩名然多儒譽殆肖  
其人

劉效祖字仲修濱州人嘉靖庚戌進士除衛輝推  
官徵授戶部主事歷員外郎中出爲陝西按察  
副使有雲林橐

副使負經世畧坐計吏營官晚寄情詞曲所填小令可  
入元人之室如沉醉東風云東華路塵沙滾滾玉河橋  
車馬紛紛官高休羨榮命蹇須安分靠青山緊閉柴門  
閒把英雄細討論能幾個到頭安穩又一闕云門巷外  
旋栽楊柳池塘中新浴沙鷗半灣水繞村幾朵雲生岫  
愛村居景致風流問吸盧仝茗一甌醉翁意何須在酒  
朝天子云喜碧山日親把銀魚早焚銷繳了功名分輶  
車鳩杖鹿皮巾也不讓黃金印晚景無多前程休問趁  
明時自在隱尋幾個故人圍坐在葦門嘗則把陰晴論

雜之小山樂府中不能辨也昭陵嘗遣中使索其題冊呼曰念菴念菴副使別字也因賦詩云更生雙鬢已蕭騷敢謂文章擅彩毫過誤偶承明主問因緣不是鬱輪袍都人傳其事以爲列朝所未有詩亦爽豁惜集不傳

方宏諤字定之歙縣人嘉靖庚戌進士累官南京

戶部右侍郎

附錄王仲房云定之祖法盛唐而於王孟尤近若流水不知處幽禽相與飛不知春色滅忽見林花飛永日空山寂幽然時一吟宛然二君遺響也

樂尙約字孔源膠州人嘉靖庚戌進士由溧水知縣選授江西道御史謫安州判官遷懷慶推官  
被論削籍

孔源宮詞云玉簫吹斷落花香空結流蘇五鳳凰不遣  
和戎卽恩幸敢矜顏色過昭陽殊不失溫柔敦厚之教

潘季馴字時良號印川烏程人嘉靖庚戌進士除  
九江推官擢江西道御史升大理寺丞歷少卿  
以僉都御史治河累官南京兵部尙書罷歸起  
刑部尙書加太子少保總理河道有畱餘堂集

印川自嘉靖乙丑受命治河至萬歷庚辰工成著有宸  
斷大工錄先後四總河務晚輯河防一覽其大指謂通  
漕於河則治河卽以治漕會河於淮則治淮卽以治河  
合河淮而同入於海則治河淮卽以治海立意在築隄  
束水借水刷沙以此奏功百年以來俱守其指畫可謂  
能捍大患者獨怪天啓初補諡列朝名臣而公獨不與  
焉錄其詩爲之歎息

龐尙鵬字少南南海人嘉靖癸丑進士除平樂知  
縣入爲監察御史歷官右副都御史巡撫福建

天啓初追諡忠敏有百可亭摘橐

少南視鹺兩浙總理兩淮長蘆鹽屯身處脂膏不能自  
潤集中虛室行云細視餅中久無粟舉火終朝待鄰曲  
長飢近午始一餐敢望豐年收萬斛自注三月中旬已  
貸粟矣卽此亦是難得

李蓑字于田內鄉人嘉靖癸丑進士選庶吉士除  
檢討遷南京禮部郎中歷官提學副使有太史  
集

于田博洽中州人以擬楊用修而歸田之後縱情聲伎



放誕不羈女優登場至雜伶人中持板按拍主人知而  
延之上坐恬然不爲怪及去借主人櫪上馬挾女優連  
騎而去此其狂態更甚於用修矣詩亦少深思絕句頗  
強人意嘉靖宮詞云沉水龍涎徹夜焚桂宮芝館結祥  
雲壇前纔布諸天位苑外先催學士文玉貌終年侍禁  
闈每逢時節賜金緋君王不愛纖腰舞裁作雷壇拜斗  
衣小車飛曳向元都翠羽金翹笑自扶玉竦樹邊長日  
市內璫爭買大秦珠泥金檢玉祝長生萬國封章止進  
呈月滿西宮更漏永九重風落步虛聲

徐師曾字伯魯吳江人嘉靖癸丑進士選庶吉士

授兵科給事中歷刑科左給事有湖上集

伯魯說經鏗鏗又輯文體明辨以迪後學一官清要五  
疏乞歸其述志賦云相先民之不朽兮托三事而流傳  
吾何有一於茲兮死速朽而猶譽借青春之不我與兮  
忽已至乎衰年胡不及時以精進兮擇可修而勉旃昔  
賢有言老未至椿衰不及頓尙可厲志於所期又言進  
不及達退無所矯伯魯之謂矣詩亦清婉蓋斤斤學唐  
者

季科字與登江陰人嘉靖癸丑進士除行人選授  
禮科給事中出爲江西布政司參政有雪浪閣

居二稔了菴鷗盟錄

與登歸田之後田產所入悉以築圃圃在萬壽山麓中  
有六曲徑蒼雪嶺賜閒堂雪浪湖湖中有青螺墩妙高  
閣湖上有寄寄堂紅雪閣華陽洞天又鑿洞爲小桃源  
中有赤城樓來鶴亭桃花泉曲九亭雲林桐江片石恒  
與朋舊觴咏其間足稱好事詩亦安整不佻

盛周字文郁秀水人嘉靖癸丑進士除知浦城縣

入爲刑部主事歷郎中出知東昌府

太守少從王龍溪游與沈先生靖夫講學于聞湖書院  
道址在梅家蕩水中與其子姓至今聚族于斯聞其報  
最日忤分宜父子不得臺諫蓋莊士也

姚汝循字敘卿上元人嘉靖丙辰進士除祀縣知  
縣遷南京刑部郎中出知大名府謫嘉州知州  
有錦石齋集

敘卿詩格不高然五古遠倣陶韋近體能宗大歷此益  
藩演南道人人之李何諸公之列目爲盛明十二家也

回雁峰云回雁峰頭望帝京寒雲黯黯不勝情賈生已  
道長沙遠今過長沙又幾程

卞錫字叔孝嘉善人嘉靖丙辰進士除中書舍人  
選吏部稽勳主事有豹山集

附錄陳仲醇云分宜柄國言者以虬蟬撼樹不勝者  
止司勳往往抗其盛氣方袖封章彈之適聞親訃還  
里故其居恒所爲詩聊蕭不平感慨畢露

錢鎮字守中烏程人嘉靖己未進士官兵部郎中  
有淡菴集

守中從唐子鎮講學居弟子之首而詩無塵腐之習中  
年卜宅思溪掘地得宋王觀察永從墓亟掩之而築堂  
其上不以爲忌也永從嘗刊五代史纂誤雜錄二書置  
本郡庠後取以補監本見陳氏書錄解題今思溪土人  
不復有知其姓名者矣錄守中詩附識於此

張祥鳶字道卿金壇人嘉靖己未進士除戶部主  
事歷員外郎中出爲河東運司同知遷知雲南  
府有華陽洞稟虛菴集

道卿詩瀟灑絕俗頗類永嘉四靈上巳日寄鄭虛舟云

三月三日春可憐百勞聲裏花如煙臨邛大夫有佳客  
廣文先生無酒錢放歌誰知舞雩曲洗研獨寫蘭亭篇  
我欲從之問奇字出門無那春風顛

附錄愚山云道卿與七子同時亦相還往其詩以清  
潤爲主不染叫囂之習故不爲時人所稱如云雁嘶  
江塞月人枕戍樓霜信警句也

申時行字汝默吳縣人嘉靖壬戌賜進士第一累  
官少師兼太子太師吏部尙書中極殿大學士  
卒贈太師諡文定有賜閒堂集

趙尙書狃識于廷益於早歲顧尙書璘識張叔大於童  
時傳者以爲佳話先太傅公九齡獲見文定文定特起  
避席時先公未就塾文定畱之邸第讀書一日從師出  
遊先公失足蹈汙泥文定命僮子回取履僮子誤持文  
定朝鞵至先公不敢納文定笑曰履之終當踐我迹耳  
及舉順天鄉試同學少年有恃才者曰朱兆隆亦能成  
名邪文定怫然曰兆隆將大魁天下若輩焉知明年先  
公果臚傳第一其藻鑒不爽若是文定不以詩見長然  
鉅篇長律鋪揚典麗足令操觚者縮手如云老去空悲



千里驥秋來真憶四腮魚風度可想也

余有丁字丙仲鄞縣人嘉靖壬戌賜進士第三除  
編修累官戶部尚書兼武英殿大學士終少傅  
兼太子太傅建極殿大學士卒贈太保諡文敏  
有文敏公集

文敏送張岨峽肖甫一律云客行新霽後曙色啓城頭  
曉徑穿雲溼春塘帶雨流江籬牽客思山鳥動春愁何  
事新芳歇王孫不可畱絕類劉文房

戚元佐字希仲秀水人嘉靖壬戌進士除禮部主

事歷員外郎中升尙寶司少卿有青藜閣稟

吾鄉彭子殷論詩卽尙七子然其詩不類也至戚希仲  
則全以七子爲圭臬弇州列四十子不及希仲何與早  
朝云鳳掖傳呼早晨趨逼禁闈天香浮輦靜宮漏隔花  
微仙掌明河動周廬列宿稀不知風露重先溼侍臣衣

鄭履淳字伯寅海鹽人嘉靖壬戌進士除刑部主

事改尙寶司丞建言廷杖終光祿寺少卿有集  
昭陵繼世海宇冥清少卿時爲尙寶丞初無言責乃上  
痛哭之書至云物怪人妖天鳴地震彗星兩見於尾女

卷之二 方音言 卷之二  
四  
日月繼蝕於元春鬼神告凶苗害洊至殆有陳涉阿骨  
打之徒窺伺於世雖李綱宗澤之才展布猶難其亦過  
於激烈矣當日子杖一百流血濡縷至今遺袴藏其故  
宅

沈元華字遠伯一字少河嘉興人嘉靖壬戌進士  
除禮部主事歷官南京太常寺卿轉大理寺卿  
明南都太廟嘉靖中爲雷火所焚尙書湛若水請重建  
而夏言阿世宗意請罷有旨并入奉先殿按長陵每自  
稱曰朕高皇后第四子也然奉先廟制高后南向諸妃

盡東列西序惟碩妃一人具載南京太常寺志蓋高后  
從未懷妊豈惟長陵卽懿文太子亦非后生也世疑此  
事不實誦沈大理南都奉先殿紀事詩云高皇肇太廟  
松桷連穹竄尊祖有孝孫典禮通升躋一從遷都後遺  
制終未睽有司列俎豆上公視瓚圭豈意歲甲午烈火  
驟熾題謔謔出出音其兆先端倪盈庭議移祀中廢成  
町畦猶餘奉先殿薦新及菹醢微臣承祀事入廟歌鳧  
鷺高后配在天御幄神所棲衆妃位東序一如獨在西  
成祖重所生嬪德莫敢齊一見異千聞實錄安可稽作

詩述典故不以後人迷斯明徵矣大理性恬退不樂膺仕歸遂潔白之養歿後元孫傳弓撫拾遺集早夭失傳是詩獲於高工部寓公家

王叔臬字陽德永嘉人嘉靖壬戌進士官至湖廣參政有玉介園橐

王氏爲永嘉族望其先世毓生七子七子生二十八子二十八子生九十四子九十四子生二百六子二百六子生三百五十子參政其一也三百五十子生四百九十子其枝葉亦繁昌矣

穆文熙字敬甫東明人嘉靖壬戌進士除行人進  
司副遷工部員外改尚寶司丞轉吏部員外出  
爲廣東按察副使有逍遙園集

敬甫論詩沾沾自喜亦強作解事爾集爲劉子威石拱  
辰所定又安得佳

錢貢字時庸桐鄉人嘉靖壬戌進士除知新建縣  
入歷刑部郎中有愛存橐

錢公居饒山之陰沒葬山麓其後人至今聚族柞溪左  
右桑麻松竹蔥蒨依然長篇不事雕繪有白太傅遺音

京邸懷歸別妻弟唐楮汀云此日意不樂掩關有所思  
忽聞君遠來錯愕令我疑平生不辭鄉安得來京師去  
年與君別屈指已一稔南望懷故人日與浮雲馳嗟予  
坐羈東素顏日以緇金門盛才賢迂疎將何爲感之百  
憂集歎息還自嗤君今馬首南握手復何辭投簪雖未  
能煩君語吾兒貧賤雖爾慙富貴匪我期願言各努力  
勉將門戶支予家柞溪東綠水環茅茨豈獨饒桑麻松  
竹植亦宜好闢十畝園樹藝須及時護筍編枳棘灌花  
引泉池待于此中老與君同栖遲此願良未果永懷常

在茲去去勿復陳人生多別離夜闌欹枕卧暑雨捎采  
恩

何洛文字啓圖信陽州人嘉靖乙丑進士選庶吉

士歷官禮部左侍郎兼翰林院學士有震川集

震川大復之孫仕雖通顯詩頗庸熟去祖武向遠題章

皇帝御筆白馬云臺上黃金駿毫端白雪驄玉花生御

榻寶繪奪天工照夜雙珂瑩凝霜匹練空瑤池仙馭遠

猶見畫圖雄

胡淳字原荆無錫人嘉靖乙丑進士除永豐知縣



再知安福人爲廣西道御史以建言落職爲民  
有采真堂集

侍御以建言削籍任俠結客所識窮乏多受其恩歿後  
王承父爲具狀屠緯真爲銘墓王元美爲作傳咸盛稱  
之詩亦間有合作過雅宜別業云不見王摩詰猶餘華  
子岡隔河山杳靄斷樹水微茫有子開松徑畱歡正夕  
陽漁舟投暝合杯外卽滄浪

潘志伊字嘉徵吳江人嘉靖乙丑進士除定州知  
州升南京兵部員外歷郎中出知九江府謫知

陳州移紹興府同知轉南康知府以江西按察  
副使備兵袁州以行太僕寺卿轉甘肅遷廣西  
參政

潘公從游吾鄉沈石雲先生之門講學之餘詩不多作  
所題存石草堂一篇卽石雲之書屋也其辭云名園迴  
塵域參差開石林丹梯襲曉光碧嶂含夕陰昔自鬱林  
來置此閑幽襟緬彼巨靈跡宛在梧江潯夫子肯堂構  
誅茅面雲岑棲巖意已遠陟岵思逾深樞衣綠磴道拭  
目見嶽峯茲言懷仰止誰謂愜登臨

王圻字元翰上海人嘉靖乙丑進士除清江知縣

調萬安擢雲南道御史出爲福建按察僉事謫

邛州判官兩知進賢曹縣遷開州知州歷官湖

廣提學僉事陞陝西布政司參議有洪州類彙

洪州拜分陝之命卽請告終養旣歸淞江之濱種梅萬

樹自曰梅花源仰屋梁著書門溷皆安席硯所撰續文

獻通考諡法通考兩浙鹽志海防志三吳水利考稗史

彙編雖舛漏尙多體例未當要亦畱心有用之學者觀

忠惠祠有感云傑哉龍陽尉忠義今所希民瘼一憤激

抗疏干天威手持登聞鼓口叫闐闐扉但念流亡苦豈  
惜軀命微雉經悟明主捐生視如歸歲額減過半始願  
終不違皇恩與士節千古同光輝春秋薦蘋藻英爽此  
永依遺跡炳簡策身沉名自飛願爾賢達裔奕世延清  
暉

附錄郭美命云遠之北地信陽近之海門所稱七子  
此亦一是非彼亦一是非諸君子爲的而後進之士  
射聲焉未有能中者也先生詩黜其佻巧而本之自  
然謝其夸毗而歸之實際去其叫噪而由乎冲虛蓋

矯志而獨行者也

歸有光字熙甫崑山人嘉靖乙丑進士除長興知縣量移順德通判遷南京太僕寺丞有震川先

生集

弇州早年評震川文謂如秋潦在地有時汪洋不則一瀉而已晚歲乃作贊云千載有公繼韓歐陽子豈異趨久而自傷蓋悔之深矣詩非兼擅然猶勝七子成派遊靈谷寺云晨出東郭門初日照我顏春風吹習習好鳥鳴喧喧巖阿見黃屋登坡尋神山半日猶山麓十里長

松間蜿蜒芳草路寂寞古禪關畫廊落丹雘朱戶蝕銅  
鑲殿起無梁迴墀畱玩珠攀蒼鼠戲樹捷野鹿看人閒  
山深靜者愛日宴未知還

皇甫冲字子浚長洲人嘉靖戊子舉人與弟淳汭

濂竝有盛名稱四皇甫有華陽集

四皇甫詩源出中唐兼取材於潘左江鮑清音亮節淨  
端氛埃高蘇門華鴻山楊夢山而外無有及之者送劉  
朝甫還吳云同遊心事已成非忍向都亭復送歸二月  
渾河水尚合三春禁柳色猶微舊來道路愁能記此去

音書憶到稀極目輕舟雲水上別君那得不沾衣

皇甫淳字子安嘉靖壬辰進士除工部主事調禮

部歷郎中改補右春坊司直兼翰林檢討左遷

廣平通判量移南京刑部主事進員外升浙江

按察僉事有少元集

子安逸藻風飛清文綺合視子循工力悉敵銖兩未分

宜子浚之難為兄而子約之難為弟也春日齋中即事

云仲春氣妍和蘭薄幽可踐開軒眺遠野文霞靄層巘

黃鳥鳴芳菲綠蘋泛清淺感物懷古人細帙聊自展嘗

欽柳下黜頗悅邴生免苟持齊物心得喪兩俱遣

附錄弟子循云兄詩錯綜魏晉而託宿於唐英特工  
五言而七言近體薄不經想其爲篇七幽元以通思  
春容以御氣婉麗以陳詞和易以達理憤懣以抒情  
繇暢以該事雋永以歸趣其始構也隻字不愜於心  
片言無豔於目踣壁窮思擁衾寤索曾不少休是以  
吟苦則彌日不就神來則下筆立成

皇甫沔字子循嘉靖己丑進士歷工部郎中謫黃  
州推官召爲南京吏部郎中又謫開州同知量



移處州府同知陞雲南按察僉事有司勳集

百泉清音藻思五言整於小謝五律雋於中唐惟七言  
蕙弱兄弟攸均集六十卷自言始爲關洛之音變而爲  
楚再變而爲江左三變而爲燕趙四變而爲蜀旣返初  
服取篋中稟檢閱凡興寄未深格調不古語非絕俗句  
非神采者刪之且曰有志慕古而力不逮心恥時尚而  
薄不爲又言關中之詩猶燕趙之詩厲齊魯之詩侈河  
內之詩矯楚之詩蕩蜀之詩澀晉之詩鄙江西之詩質  
浙之詩擘吳下之詩靡有高視一世之槩焉要其五言

清真朗潤妙絕時人匪徒火攻伯仁而已奉答子安兄  
云江郭改故陰家園藹新霽柔條始發林芳草漸紆砌  
潘居信爲閒楊亭况重閉曰予忝明時與子承嘉惠分  
省各有誓佐郡慙所泣暫就北山轉愜東田稅情忘  
桃李言跡豈匏瓜繫感遇興長謠來章緬幽契寄懷王  
道思云本乏希世姿翻爲逢時誤良友豈不懷邁征詎  
遑顧日暮勞所思凌風未成晤將從夢寐求緬邈山川  
路答徐紹卿見懷云停雲遙引望良晤近何疎以我邱  
中想開君湖上書花飛人別後木落雁來初祇爲懷徐

孺長令夜榻虛

皇甫濂字子約一字道隆嘉靖甲辰進士除工部

主事謫河南布政理問稍遷興化同知有水部

集

蔡子木哭子安詩云五字沉吟詩品絕一官樵悴世塗  
難李于鱗送子循詩云吳下詩名諸弟少天涯宦迹左  
遷多子約宦亦不達與諸兄同詩稍不逮也不赴郡檄  
答子循兄云矯翮思霄翥游鱗託淵沉物類各有適殊  
塗難並尋豈伊世網慮擾擾誰爲心振衣還東山寢迹

棲舊林江海多風濤舟楫弭川陰無令衝波激但恐蕙  
序侵願言謝西府谷口有微音陳卧子評云固是雅人  
馮惟健字汝強臨朐人嘉靖戊子舉人有治泉集  
按汝強登觀音寺詩云天削孤峰峻巖閣最上頭窮巖  
藏古寺懸石結危樓雪瀑千林潤松門六月秋夜來禪  
榻卧天漢掌中流姑熟道中云烟起樹色暝水生江岼  
仄夜來別故人風雨最蕭瑟

附錄愚山云汝強兄弟四人三人皆有集以才名稱  
齊魯間獨惟重無聞焉而文敏公琦則惟重之孫也

魯王孫觀焮撰海岳靈秀集論三馮之才則首推汝  
強云

馮惟敏字汝行惟健弟嘉靖中舉人謁選涑水知  
縣改鎮江儒學教授遷保定通判有海浮集

臨朐冶源山水勝絕高梧一林修竹萬个泉流其中  
善長所云分沙漏石者也土人謂園是海浮所築繅馬  
林間想見東山絲竹之盛後游莫再恒繫於懷讀先生  
七里溪別墅二詩猶不禁神往詩云知足始遠辱至人  
貴自全不羨公與侯所志受一廛吾家有舊業乃在城

東偏一邱藏一壑宛轉依清川生涯故不常中道成棄  
捐棄捐從此去一去二十年非無五畝宅在邑多糾纏  
幸茲協初心歸我汶陽田我田無遠近處處綠澄溪朝  
發巨洋許暮泊野水棲野航流北陸香稻來東齊豈伊  
賁異穀美利貽烝黎名山近村落追暇恒攀躋仰瞻霄  
漢遙俯眺浮雲低翩翩比翼鳥乃在太行西終歲不合  
并激昂飛且啼

馮惟訥字汝言惟健季弟嘉靖戊戌進士歷官江  
西左布政使以病請老特進光祿寺卿致仕有

光祿集

光祿詩亦華整可觀三馮竝稱其賈氏之偉節乎秋日  
寄懷家兄云燕山木落雁來遲遠客南歸未有期明月  
雙懸江海淚秋風一寄鶴鴿詩淹留賈誼才無敵漂泊  
馮唐鬢欲絲最是昭王遺恨處草金臺上草離離

卜大同字吉夫秀水人嘉靖庚戌進士授刑部主  
事歷官福建按察副使有監泉集

卜大有字謙夫嘉靖丁未進士除知無錫縣調潛  
山遷南禮部主事終尋甸知府有益泉詩彙

卜大順字信夫嘉靖癸丑進士除知當塗縣入爲  
刑部主事改吏部歷稽勳司郎中有篋泉集

三卜同懷取甲第仕俱不達而子姓至今猶保其故廬  
其後岳氏繼起雖臻臚仕而後嗣凋謝曰甚矣謙夫頗  
好事著述多有刊行者予既錄三馮詩爰以三卜先生  
作附於後吉夫同戴前峰遊赤壁云共有探幽興言尋  
赤壁遊昔賢不可作吾輩復相求孤鶴今何在長江漫  
自流因之重懷古對此且淹畱謙夫秋日遊牛首和韻  
云黃菊枝頭未破叢曉臨蕭寺野煙空九江波浪開天



塹六代繁華想帝宮醉後幾吟豪士賦與來直上最高  
峰日斜徙倚朱闌遍縹緲孤雲是越中信夫鄧尉探梅  
云日斜游倦宿湖干一望苔枝湧翠巒午夜月明涼似  
水船頭獨坐不知寒

侯一元字舜舉樂清人嘉靖戊戌進士累官河南  
布政使有二谷集

二谷詩雖率易然有真趣看新歷有感云少日見星歷  
每自閱紀年常常在人後漸漸出其前壯志輕遠道久  
爲車牛牽曾未幾何時歲月忽我遷一朝見新歷我辰

不及編元雖貞下起所惜非故躔不知義和馭何日還  
來旋在天無停晷在地無停川吾生長已矣來者其勉  
海

栗應宏字道甫長治人舉人有山居詩集

附錄愚山云道甫累試南宮不第耕讀太行山中高  
子業解司封歸道甫擔簦相造雞黍定交子業作紫  
團山人歌贈之云紫團山高巢青雲栗家兄弟殊不  
羣陳州一出驅五馬令弟二十窺三墳陳州者道甫  
之兄仁甫也道甫山居詩六卷子業爲之序

何良俊字元朗松江華亭人由歲貢生授南京翰

林院孔目有清森閣集

元朗早歲入南都隨顧東橋游讌多習舊聞東橋每宴  
集輒用教坊樂以箏琶侑觴當康陵南巡日樂工頓仁  
隨駕至北京得金元人雜劇元朗妙解音律令家中小  
鬟盡傳之置酒留賓恒自度曲有李節者善箏歌元朗  
品爲教坊第一於時名彥咸賦詩畱贈黃淳父詩所云  
十四樓中第一聲也其後引歸海上倭亂避地青溪旋  
徙吳門然文酒之會未嘗廢絲竹也詩頗率意其買宅

句云一須焦革鄰舍二要秦青對門興固自豪第乖好  
樂無荒之義矣春日寓懷云東方雖大隱終是漢庭臣  
如何敢恣肆嘲哂萬乘尊武帝本愛才寵賜亦殊倫百  
金買少婦終歲輒易人侍從匪孤遠諷說恒見親當時  
非不遇傲兀竟何因我今六尺軀頭白久沉淪始圖佐  
明時一官終爲貧比肩侏儒笑爭食雞鶩真放身鹿豕  
場終勝金馬門若非速謝去孤意何由申

文彭字壽承長洲人待詔徵明伯子由歲貢生仕

爲國子監博士

文嘉字休承徵明次子由歲貢生官和州學正

二文翰墨無忝衡山詩雖流傳不多以比彭陸居周固  
當較勝博士題溪南別業云西溪溪水深不流溪南更  
築林堂幽會心自有濠濮想乘興不數山陰舟一簾暮  
雨足吟眺萬疊春山作卧遊主人縱有蒼生寄清夢依  
然狎白鷗學正石湖云鴛鴦鷓鴣滿晴沙紅杏天桃亂  
著花十里湖山開畫障一雙小艇載琵琶題畫云清絕  
倪迂未易攀能將水墨繼荆關疎林斜日茅亭外一片  
江南雨後山沉香烟暖碧牕紗綠柳陰分夏日斜夢覺

只聞鈴索響不知山鳥啄枇杷

張鳳翼字伯起長洲人嘉靖甲子舉人有處賢堂

集

伯起好填詞梨園子弟多演之然俗筆耳其弟叔貽詩亦庸庸惟幼于小有才然亦頽惰自放而吳人之諺比於四皇甫論其工拙判若雲淵矣養蠶曲云曉露沾我襦採桑過南陌葉少不盈筐蠶饑妾行迫蠶眠妾不眠絲成供夜織勞苦有如此方能成匹帛奈何衣帛人剪裁不復惜竹枝詞云妾從湘江歸君向湘江宿欲識淚

痕多請看湘江竹

張獻翼字幼于更名救國子監生有文起堂正續

集

幼于早擅才名見賞於文徵仲讀書上方山治平寺中  
撰周易約說雜說臆說及讀易紀聞讀易韻攷不失爲  
儒生後乃狂易自肆與所善張孝資檢點故籍刺取古  
人越禮任誕之事排目分類仿而行之兩人爲儔侶或  
歌或哭或紫衣挾伎或白足行乞孝資生日自爲尸幼  
于率子弟總麻環哭上食設奠孝資坐而饗之翼日行

卒哭禮設妓樂哭罷痛飲謂之收淚又有劉會卿典衣  
買歌者俄而病卒幼子持絮酒就其喪所哭之以詩復  
令會卿所狎胡姬爲尸仍設雙備夾侍作使伶人奏琵琶  
再作長歌酌焉其放浪亦甚矣晚攜妓居荒園中爲  
盜所殺詩乘興會捷書無暇持擇七夕同趙令燕賦云  
翠帳紅妝送客亭佳人眉黛遠山青試從天上看河漢  
今夜應無織女星

李攀龍字子鱗歷城人嘉靖甲辰進士除刑部主  
事歷郎中出知順德府升陝西提學副使轉參



政終河南按察使與王世貞謝榛梁有譽宗臣  
徐中行吳國倫稱七才子有滄溟集

于鱗樂府止規字句而遺其神明是何異安漢公之金  
滕大誥文中子之續經乎惟相和短章稍有足錄者五  
言學步蘇李曹劉如浮雲從何來焉知非故鄉來者自  
爲今去者自爲昔差具神理然新警者寡矣七古五律  
絕句要非作家惟七律人所共推心慕手追者王維李  
頎也合而觀之句重字複氣斷續而神孤離亦非絕品  
元美比之峨眉天半雪至謂文許先秦上詩卑正始還

譽過其實于鱗乃居之不疑據白雪樓高自位置此時  
章邱李伯華架插萬卷書海豐楊伯謙吟精五言體是  
宜降心相從乃敢大言謂微吾竟長夜豈非妄人又自  
詡與元美狎主齊盟目四溟以橐鞬鞭弭左右四溟豈  
心服乎于鱗古意云秋風西北起吹我游子裳浮雲從  
何來安知非故鄉蕭蕭胡馬鳴翩翩下枯桑暮色入中  
原飛蓬轉戰場往路不可懷行役自悲傷懷子相云薊  
門秋杪送仙槎此日開尊感歲華卧病山中生桂樹懷  
人江上落梅花春來鴻雁書千里夜色樓臺雪萬家南

粵東吳還獨往應憐薄宦滯天涯贈梁伯龍云太華峰頭玉女壇別時明月滿長安不知秋色今多少君到仙人掌上看

附錄愚山云于鱗擬古句摭字拈與會素然神明不屬自謂胡寬之營新豐而不知爲壽陵餘子之學步於邯鄲也七言今體三百年來推爲冠冕然舉其字則三十餘字盡之矣舉其句則數十句盡之矣百年萬里已憎叠出周禮漢官何煩雜誦專城出守動曰東方千騎方舟並載輒云二子乘舟遼海中丞襲驃

騎之號廬江別駕蒙小吏之呼投杼曾母訝許自天  
傅粉何郎冠以帝謂經義寡稽據失當何來天地  
吾輩中原矢口搆騰殊乏風人之致易詞夸詡初無  
贈處之言於是狂易成風叫呶日甚徵吾長夜于鱗  
旣跋扈於前才勝相如伯玉亦簸揚於後斯又風雅  
之下流聲偶之極敝也斯文未喪來者難誣當葵邱  
震驚之日仲蔚已有違言迨稷下消歇之時元美亦  
持異議而王元馭序弁山續集詆訶歷下謂不及三  
十年水落石出索然不見其所有斯藝苑之公論也

王世貞字元美太倉州人嘉靖丁未進士除刑部  
主事歷郎中出爲山東副使以父難解官補大  
名兵備歷浙江參政山西按察使入爲太僕寺  
卿以右副都御史撫鄖陽遷行大理寺卿歷應  
天府尹南京刑部侍郎改兵部進刑部尙書有  
弇州正續四部彙

嘉靖七子中元美才氣十倍于鱗惟病在愛博筆削千  
兔詩裁兩牛自以爲靡所不有方成大家一時詩流皆  
望其品題推崇過實諛言日至箴規不聞究之千篇一

律安在其靡所不有也樂府變奇奇正正易陳爲新遠  
非于鱗生吞活剝者比七律高華七絕典麗亦未遽出  
于鱗下當日名雖七子實則一雄其自述云野夫興就  
不復刪大海迴風吹紫瀾言雖大而非夸若于鱗自詡  
至云微吾竟長夜惑易之言亟當浴以蘭湯者也正德  
宮詞云窄衫盤鳳稱身裁玉靶雕弓月樣開紅粉別依  
回鶻隊君王新自虎城來夜半毬燈出未央俄傳鞞鏗  
向平陽六宮處處秋如水不獨長門玉漏長西城宮詞  
云兩角鴉青雙箸紅靈犀一點未曾通自緣身作延年

藥樵悴春風雨露中  
梨園弟子鬢如霜  
十部龜茲九部  
荒妒殺女冠  
諸侍長大羅  
天上奏霓裳

又云元美袁江流鈴山岡一篇長篇不費翦裁滔滔莽  
莽洵有大海迴瀾之勢題雖當廬江小吏作要其節奏  
兼本於佛經偈言其辭云湯湯袁江流嶽嶽鈴山岡鈴  
山自言高袁江自言長不知何星宿獨火或貪狼降生  
小家子爲災復爲祥瘦若鶴雀立步則鶴昂藏朱蛇戢  
其冠光彩爛縱橫孔雀雖有毒不能掩文章十五齒邑  
校二十薦鄉書三十拜太史屹屹事編摩五十天官卿

藻鏡在留都六十登亞輔少保秩三孤七十進師臣獨  
秉密勿謨八十加殊禮內殿敕肩輿任子左司空孽孫  
執金吾諸兒勝拜跪一一賜銀緋甲第連青雲冠蓋羅  
道塗倬直不復下中禁起周廬涼堂及便房事事皆相  
宜文絲織隱囊細錦爲牀帷尙方鑄精鏐胡盃蔗籬  
雕盤盛玉膳黃票封大禧五尺鳳頭尖時時遣問遺黃  
絨團蟒紗織作自留司匹匹壓紗銀百兩頗有餘煎作  
百和香染爲混元衣溫涼四時藥手自劑刀圭日月報  
薄蝕朝賀當暑祔但卧不必出稱敕撰直詞御史噤莫



聲緹騎勿何誰相公有密啓爲復未開封九重不斯須  
婕妤貼當胸密詔下相公但稱嚴少師或字呼惟中縣  
官與相公兩心共一心相公別有心縣官不可尋相公  
與司空兩心同一心司空別有心相公不得尋昔逐諸  
城翟黃冠歸田里後詒貴溪夏朝衣向東市戈矛生聲  
咳糞粉成睚眦朝疏論相公箠榜夕以至寧忤縣官生  
不忤相公死相公猶自可司空立殺爾凌晨直門開九  
卿前白事不復問詔書但取相公旨相公前報言但當  
語兒子兒子大智慧能識天下體九卿不能答次且出

門去不敢歸其曹共過城西郎司空令傳語偶醉未可  
起去者歸其曹畱者當至未九卿面如土九卿足如枳  
爲復且忍饑以次前白事司空有得色相公直廬喜司  
空稍囁嚅相公直廬恚不復問相公但取司空旨縣官  
有密詔急取相公對相公不能對急復呼兒子兒子大  
智慧能識天下體一疏天怒迴再疏天顏喜九邊十二  
鎮諸王三十國中外美達官大小員數百各各黃金鑄  
一一千金直南海明月珠于闐夜光玉猫精鴉鶻石酒  
黃祖母珠紅紫青靺鞨大者如拳蕨薔薇古刺水伽南

及阿速瑞腦真龍涎十里爲芬馥古法書名畫何止千  
百軸玉躡標金題煌煌照箱篋妖姬回鶻隊隊皆殊  
色銀牀金絲帳玉枕象牙席杏衫平頭奴絲滕雙蹴踘  
酒闌呼不見潛入他房宿生理馮子都爛煮秦宮肉生  
者百叢花歿者一叢棘近卽龍牀底遠至陰山後凡我  
民膏脂無非相公有義兒數百人監司迨卿寺以至大  
節鎮侯家并戚里逶迤洙泗步燦燦西京手老者相公  
兒少者司空子謂當操鈞柄天地俱長久御史上彈章  
天眼忽一開詔捕少司空究覈諸贓罪三木囊赭衣炎

方禦魑魅金吾一孫成餘者許歸侍意猶念相公續廩  
存晚計舳艫三十艘滿載金珠行相公船頭坐誰敢問  
譏征嘯傲郿塢間足誇富家翁司空不之成還復稱司  
空廣徵諸山材起第象紫宮募卒爲家衛日夜聲洶洶  
從奴踏邑門子弟郡國雄不論有反狀訛言所流騰宗  
社萬不憂黔首或震驚御史再發之天威不爲恒御史  
乘飛置捕司空至京司空辭相公再拜泣且絮今當長  
相別兒不負阿父相公心自言阿父寧負汝不識一丁  
字束髮辟三府月請尙書奉冠服亞汝父汝父身不保

安能相救取重懇監刑客少入別諸姬歸者吾而配不歸而鬼妻諸姬心自言司空何太癡歸者吾而配不歸人人妻還撫諸兒郎阿爺生別離金銀空饒積高與鈴山齊不得鑄爺身及身身始知兒郎心自言阿爺何太癡有金兒當使無金兒自支監刑兩指揮各攜鐵銀鐺程程視漫寢步步相扶將有酒強爲歌無酒夜傍徨秋官爰書上頃刻飛騎傳一依叛臣法砒死大道邊有尸不得收縱施羣鳥寫家貲巨千萬少府司農錢上寶入尙方中寶發助邊不得稱相公沒入優老田片瓦不蓋

頭一絲不著肩諸孫呼踐更夕受亭長鞭僮奴半充成  
餘者他州縣夜半一啓門諸姬鳥獸竄里中輕薄子媒  
妁在兩腕相公逼饑寒時一仰天歎我死不負國奈何  
坐兒叛傍人爲大笑喏汝一何愚汝云不負國國負汝  
老奴誰令汝生兒誰令汝縱與誰納庶僚賄誰股諸邊  
儲誰僂直諫臣誰爲開佞諛誰卜國梁柱誰剪國爪牙  
土木求神仙誰獨稱先驅六十登亞輔少保秩三孤七  
十進師臣獨秉廊廟謨八十加殊禮內殿敕肩輿任子  
左司空孽孫執金吾諸兒勝拜跪一一賜銀緋甲第連

青雲冠蓋羅道途以此稱無負不如一婁豬食君園中  
料爲君充庖廚以此稱無負不如一殺斃食君田中草  
爲君禦霜雪以此稱無負不如韝中鶻雖飽則掣去毛  
羽前嚙決以此稱無負不如鼠在厠雖有小損傷所共  
多污穢相公寂無言次且復傍徨頰老不能赤淚老不  
盈睚生當長掩面何以見穹蒼死當長掩面何以見高  
皇殮用六尺席殯用七尺棺黃腸安在哉珠襦久還官  
狐兔未稱尊一邱不得安爲子能負父爲臣能負君遺  
臭汚金石所得皆浮雲

附錄愚山云元美弱冠登朝與濟南李于鱗修復西  
京大歷以上之詩文以號令一世于鱗既沒元美著  
作日益繁富而其地望之高游道之廣聲律氣義足  
以翕張賢豪吹噓才俊於是天下咸望走其門若玉  
帛職貢之會莫敢後至操文章之柄登壇設壇近古  
未有迄今五十年弇州四部之集盛行海內毀譽翕  
集彈射四起輕薄爲文者無不以王李爲口實而元  
美晚年之定論則未有能推明之者也元美之才實  
高於于鱗其神明意氣皆足以絕世少年盛氣爲于



清言九言言 卷一三 三  
鱗輩牢籠推挽門戶既立聲價復重譬之登峻阪騎  
危墻雖欲自下勢不能也迨乎晚年閱世日深讀書  
漸細虛氣銷歇浮華解駁於是乎泆然汗下遽然夢  
覺而自悔其不可以復改矣論樂府則亟稱李西涯  
爲天地間一種文字而深譏模倣斷爛之失矣論詩  
則深服陳公甫論文則極推宋金華而贊歸太僕之  
畫像且曰余豈異趨久而自傷矣其論藝苑卮言則  
曰作卮言時年未四十與于鱗輩是古非今此長彼  
短未爲定論行世已久不能復秘惟有隨事改正勿

誤後人元美之虛心克已不自掩護如是今之君子  
未嘗盡讀弇州之書徒奉卮言爲金科玉條之死不  
變其亦陋而可笑矣

謝榛字茂秦臨清人有四溟山人集

七子結社之初李王得名未盛稱詩選格多取定於四  
溟于鱗贈詩云謝榛吾黨彥咄嗟名士籍遂令清廟音  
乃在褐衣客於時子與公實子相元美撰五子詩咸首  
四溟而次以歷下旣而布衣高論不爲同社所安歷下  
乃遺書絕交而曰豈其使一眇君子肆于二三兄弟之

上必不然矣迹其隙末乃因明卿入社四溟喻以糞土  
由是布惡於衆元美別定五子遽削其名曰後五子則  
南昌余曰德德甫蒲圻魏寰順甫欵汪道昆伯玉銅梁  
張佳允肖甫新蔡張九一助甫也曰廣五子則崑山俞  
允文仲蔚濬盧柟次榎濮陽李先芳伯承孝豐吳維嶽  
峻伯南海歐大任楨伯也曰續五子則陽曲王道行明  
甫東明石星拱辰從化黎民表維敬豫章朱多燿用晦  
常熟趙用賢汝師也曰末五子則用賢及京山李維楨  
本寧鄞屠隆緯真南樂魏允中懋權蘭溪胡應麟元瑞

也其後廣爲四十子而四溟終不得與焉故四溟賦雜  
感詩有奈何君子交中道兩棄置之句亦可憫矣歷下  
有言眇君子雖毫而繩墨猶存則亦未嘗深絕之特明  
時重資格於章服中雜以韋布終以爲嫌爾四溟論詩  
云平順却難嶮巖易斤斤局守格律尺寸不踰有雋句  
而乏遠神有雄句而無生氣或謂勝弇州之汗漫然弇  
州才大如曹孟德放蕩無威儀笑時頭沒杯案不失爲  
英雄四溟罄折雖工特公孫子陽之修飾邊幅僅堪作  
清水令耳暮秋卽事云十見黃花發孤樽思不勝關河

秋後雁風雨夜深燈留滯愁王粲交游憶李膺相隨年  
少子走馬獵韓陵宿淇門驛有懷云駐馬淇門夕堂空  
暑氣徂亂雲關樹暝寒雨驛燈孤身計聊時序鄉心復  
道塗何當報知己秋雁滿江湖秋日懷弟云生涯憐汝  
自樵蘇時序驚心尙道塗別後幾年兒女大望中千里  
弟兄孤秋天落木愁多少夜雨殘燈夢有無遙想故園  
揮涕淚况聞寒雁下江湖

附錄愚山云山人嘉靖間挾詩卷游長安脫黎陽盧  
柟于獄諸公皆多其行誼爭與交驩是時于鱗元美

結社燕市茂秦以布衣執牛耳已而于鱗名盛茂秦  
與論詩頗相鑄責于鱗遺書絕交元美諸人咸右于  
鱗交口排茂秦削其名於七子五子之列然茂秦游  
道日廣秦晉諸藩爭延致之河南北交稱謝榛先生  
諸人雖惡之不能窮其所往也當七子結社之始尙  
論有唐諸家茫無適從茂秦主選十四家詩熟讀之  
以奪神氣申詠之以求聲調玩味之以裒精華得此  
三要造乎渾淪不必塑謫仙而畫少陵諸人心師其  
言厥後雖爭擯茂秦其稱詩之指要實自茂秦發之

茂秦今體工力深厚句響而字穩七子五子之流皆不及也

梁有譽字公實廣州順德人嘉靖庚戌進士任刑部主事有蘭汀存橐

蘭汀學詩於秦泉又與鄉人結社號南園後五子所得於師友者深雖入王李之林習染未甚誦其古詩猶循選體五七律亦無叫囂之狀四溟而下庶幾此人度越徐吳奚啻十倍瓜步眺望云殘虹慘澹已黃昏江上烟波獨愴魂京口樹濃藏雨氣海門風急長潮痕西來暮

色連三楚北望浮雲隔九關正值旗亭須買醉憂時懷  
士不堪論夜宿清遠江口云短檣依依繫晚風壯懷離  
思浩無窮荒邨夜急菰蒲雨遠戍秋悲鼓角風白雁影  
斜江樹暗青猿聲斷嶺雲空更堪處處征輪急深箐休  
論戰伐功

宗臣字子相揚州興化人嘉靖癸丑進士除刑部  
主事改吏部歷員外郎中出爲福建參議遷提  
學副使有方城集

子相詩才娟秀本以太白爲師跌宕自喜使其不遇王



李充之不難與昌穀蘇門伯仲自入七子之社習氣日  
深取材日窘撰體日弱薜荔芙蓉蘼蕪楊柳百篇一律  
訖未成家而天最可惋惜如對曹蜎李志有狐狸貓貉  
噉盡之憂然猶愈徐吳之木俑土偶也登江門諸山云  
山頭日白雲英英千峰倒插千江明手把芙蓉步石壁  
蒼翠亂射猿鳥驚誰其雲外吹紫笙欲來不來空復情  
天風吹我佩蕭瑟况疑身在崑崙行江上聞明卿量移  
南康云復得南康信匡廬遂爾狂詩仍官長罵名或簿  
書強暮雨湘潭近秋風楚塞長江流如可返爲我到潯

陽寄陸子和云江門一別又秋分何處風烟不憶君久  
客衣裳鷄自結舊遊尺素雁爲羣十年世路彫青鬢三  
歎斯人卧白雲羽翼南溟最相近未須重勒北山文

徐中行字子與長興人嘉靖庚戌進士除刑部主  
事出知汀州府補汝寧用內計謫官稍遷瑞州  
判官擢山東僉事歷雲南參政福建按察使江  
西左右布政使有青蘿館集

子與在西曹與王李結社其贈李詩云寂寞漢魏後乃  
復挺斯人遂合同心者周旋若一身李答詩遽云旣聞

風雅音三歎文在茲元美亦以藹藹吉士目之且云子  
與性味如醍醐無處不入知其交始終無間也俞仲蔚  
稱子與喜爲篤厚之行而不自盛滿聞其歷任藩臬俱  
清介有聲卒官至不能具歛而其存曰人有所請力不  
足必勉應之曰奈何令人有慙色丁長孺西山日記述  
閩人董九華業丹青久居長興病亡不能歸櫬子與適  
上官入閩竟載其柩以行無所拘忌洵盛德也感舊云  
自別燕臺白日徂華陽碣石總荒蕪獨留一片西山月  
猶照當年舊酒壚

吳國倫字明卿其先嘉興人徙居湖廣興國州嘉  
靖庚戌進士除中書舍人升兵科給事中左遷  
南康府推官調歸德歷知建寧邵武高州三府  
遷貴州提學副使移河南參政有甌甌洞正續  
藁

明卿在七子列最爲眉壽元美卽世之後與汪伯玉李  
本寧狎主齊盟三君皆不知詩王李旣沒海內不敢違  
言劉子威馮元成屠緯真輩相與附和之甌甌太函大  
泌等集幾與四部爭富而由拳白榆等集尤而效之海

內之爲真詩者寡矣其題生壙旁亭柱云陶元亮自祭之文知生知死劉伯倫隨行之語且醉且醒不失爲達生之語

余曰德初名應舉字德甫南昌人嘉靖庚戌進士除刑部主事歷郎中出爲福建按察副使有余德甫集午渠集

德甫於詩尙未闚見門戶元美冠諸後五子之首未免阿其所好矣然其仿效陶孫作詩評未之及焉豈陽許之而陰抑之與

魏寰字順甫蒲圻人嘉靖庚戌進士除刑部主事  
歷員外郎中出知濟南府遷山西按察副使有

雲山堂橐

順甫差勝德甫尚非助甫肖甫之倫雪霽同友登王子  
山云畏路誰能到幽懷我獨偏谷中初見日樹杪忽聞  
泉倚杖青山色銜杯白雪篇交游仍舊俗風景入新年  
題白雪樓云郢調淒涼思轉幽卜居還倚鮑山邱初疑  
海氣能成市不道仙人獨有樓乘興好看明月上登高  
長嘯白雲秋琴心自在誰堪識且聽巴人下里謳

汪道昆字伯玉歙縣人嘉靖丁未進士除義烏知

縣歷官兵部左侍郎有太函集

王元美論詩文大指具於卮言七卷有云文繁而法且有委吾得其人曰李于麟簡而法且有致吾得其人曰汪伯玉又云歷下極深新安見裁是心折李汪靡有間矣竊怪其效敖陶孫作詩文評苟有寸長必加品隲顧于麟兩見而伯玉不及焉何與觀四部彙中贈汪序如云上本羲姒下則姬孔俯踞二京跨千載而上皎然若日中天其言太浮而夸似非出於中心之誠者聞伯玉

晚年林居乞詩文者填戶編號松牌以次給發享名之盛幾過於元美蓋元美所推獎二人于鱗道峻仕又不達伯玉道廣位歷崇階人情望炎而趨不慮其相埒也錢氏詆譏伯玉未免太甚所引陸無從記一事見無從正始堂集中與錢所載畧別伯玉裔孫稱無從爲伯玉弟子而無從贈弇州歌云濟南新安狹已甚君子視之特小巫不應弟子而毀先師若是也

張佳允字肖甫銅梁人嘉靖庚戌進士除滑縣知

縣徵授戶部主事改兵部右侍郎巡撫浙江徵



拜兵部尚書加太子太保卒贈少保諡襄敏有  
峒嶽山房集

肖甫以功業顯其詩亦多慨忼奮厲之氣與仰屋梁著  
書者不同人皆稱其近體不若五古較勝十等詠懷云  
毒暑不辭鍛嚴冬尚爲漁蓑葛有本性生事因其居伊  
子觸世網轉與青雲疎一謫孟諸野再遷首陽且素位  
守明誠窮途豈歎歎貴者日以貴寧得辭勞劬賤者日  
以賤庶幾遠禍樞

張九一字助甫新蔡人嘉靖癸丑進士授黃梅知

縣考最擢吏部主事歷郎中升行尙寶少卿謫  
廣平同知遷湖廣按察僉事進副使擢右僉都  
御史撫寧夏有綠波樓集

金谷之筵不遺麥韭瑤池之駿圖及盜驪物之所以貴  
善用生也七子齊盟一時風氣雷同助甫稍能用生政  
爾拔俗寄見甫弟云歷盡巴山白髮新西風何處不傷  
神馬曹踏蹬官難起烏道艱危老更貧九派長江春後  
雁一年芳草夢中人相思况是無消息徒倚天涯涕淚  
頻

俞允文字仲蔚崑山人有真逸槩

七子之教五言必宗河梁建安竊優孟之冠學壽陵之步求其合而愈離當日二子于五古極口仲蔚然仲蔚殊少神解余意尙在盧次梗下二子之言出一時之好未爲定論也然仲蔚於歸熙甫文名未盛之時結契最先又論詩不心服于鱗亦有識之士擣衣詩云重關月色早涼分夜夜砧聲逐塞雲淚盡天南與天北悲筵同是月中聞

盧柟字少梗一字次梗一字子木濬縣人太學生

有蟻蝶集

次桓詩足以高視四溟送人之塞上云北風蕭蕭邊馬  
鳴君今棄我何遠行陰山雪花大如掌黃雲出沒單于  
營萬里龍沙那可見將軍大小七十戰捷書奏入建章  
宮寄我雲中一隻箭戲寄孟龍川云舊日浮邱伯曾將  
王子喬周遊乘白鶴接引上青霄大藥留丹鼎天台度  
石橋不知千載後爲爾一相邀鍾廣漢云此詩對仗原  
出襄陽

李先芳字伯承濮州人嘉靖丁未進士除新喻知

縣徵授刑部主事歷郎中改尙寶司丞升少卿  
降亳州同知有東岱山房稟清平閣集

伯承與元美于鱗同舍皆故等夷旣而七子盛名狎主  
壇坫元美收之廣五子之列意寢不平晚逃於詞曲觀  
其詩雋一書詳于淮北遠及巴蜀而獨黜大江以南蓋  
以吳楚揚粵之間七子實居其五其微意可窺也鄱陽  
湖云吳人臨古渡湖水接天開一夜南風起扁舟萬里  
迴波漂星子縣雲沒大孤臺却望蒼茫裏匡廬秋色來  
再過玉河隄云馬蹄日日逐紅塵白髮青山應笑人昨

日玉河隄上過杏花開盡不知春

附錄于無垢云吾里兩李先生其稱詩不同歷下以氣骨合神湛涵萬有而發以雄迅意嘗超於象之表濮陽以才情赴調融洽衆采而出以和平力嘗畜於法之中譬之五音歷下則軒轅之鼓素女之琴高張急節鏗鉤駘盪足以駭耳洞心濮陽則昭華之瑄廡臺之簫肅雍和鳴可使龍吟鳳下蓋所謂異曲同工者愚山云伯承未第時詩名藉甚嘉靖七子之社伯承其若敖蚡冒也厥後李王之名已成羽翼漸廣

而伯承左官落薄五子七子之目皆不及伯承伯承  
晚年每爲憤盈酒後耳熱少年用片語挑之往往努  
目嚼齒不歡而罷邢子愿以臺使按吳訪弇州而歸  
伯承與極論其始末語已目直上視氣勃勃頤頰間  
拍案覆杯酒汁沾溼子愿逡巡不敢應後爲伯承誌  
墓亦畧及之今之論者奉歷下爲晉楚揶揄伯承使  
之捧盤盂而從小邾之後此耳食之口論也